

Wie schnell doch unser Zeit vergieht

Om letzte Sunndaach sinn merr e Sticksche dorchs Feld gonge unn hawwe debei wie immer vill geschwätzt. Nor de Karl war gonz still, der hott nor alls in die Geechend geguckt unn hott alls nor de Kopp geschittelt

Ich habb die Paula gefroocht: Was hotter dann, doin Karl?

Die Paula hott ihrn Monn gestumpt, awwer der hott als weider de Kopp geschittelt. Dann gibtse merr Antwort: De Karl hott om Somsdaach gemerkt, wie schnell die Zeit vergieht.

Jetzt habb ich de Kopp geschittelt. So? Wie hottern dess gemerkt?

Doo hott die Paula erzählt: Ei, erst emol, wie er middaachs die Gass gekehrt unn debei soin Schadde geseh hott, wie korz der war, unn dann nochemol owends um elf, wie er die Hausdier zugeschlosse unn gesehe hott, dass de Himmel noch hell gewese iss. Unn dessweeche hotter heit moie gebrummelt: Kättche, wie schnell doch unser Zeit vergieht! Doo mischt sich de Schorsch oi. Doo hotter Recht, doin Karl, weil in e paar Woche mache die Mauerseechler schunn widder ab. Die werrn merr fehle om Himmel.

Ich habb gesacht: Was hawwe mir ferr scheene Summerveechel! Om meisde awwer freu ich mich iwver die Turteldäubcher drauße im Kerschewald. Wenn ich dene ihr Stimme heer, erinner ich mich droo, wie ich als Kind mettem Ruppertsvadder ins Feld gefahrn bin, dess war so die ersd Voochelstimm, uff die de Opa mich uffmerksam gemacht hott. Wenn ich heitzedaach die Turteldäubcher heer, iss merr immer noch, als det ich uffem Waache newerm Opa sitze, die Kuh devor, die uns gonz longsom ins Feld unn widder hoom gebrocht hott. Unn um die Zeit wie jetz hott de Opa immer nooch de Wolke geguckt, weil wenn e Gewitter im Oomarsch war, mussde merr so schnell wie meechlich hoom.

Dess Kättche hott zugestimmt: Letzt Woch, wies so gekracht hott, habb aach ich droo denke misse, wies frieher war. Bei uns dehoom, wenn nachts e Gewitter war, mussde merr aus de Better unn mussde uns ooziehe. Dann hawwe merr in de Kich gesesse, hawwe gebet unn hawwe gewart, bis dess schlimmsde vorbei war. Unn wehedem, wenn ooner was esse wollt, dess hotts nit gewwe, doo hott unser Oma immer gedroht: Den Beter lass beten, den Schläfer lass schlafen, den Esser schlaach dot!

Ich saach: Den Spruch kenn ich aach, awwer ich habben nie verstonne.

Dess Kättche weider: Also, ich denk, dess war so: Wenn merr nachts in de Kich gesetze hott, hawwe mir Kinner unn aach die Große immer ebbes esse wolle, unn weils joo nit vill gewwe hott, hott merr dess uff die Art unn Weis verbotte, weil wer wollt dann weeche emm bisje Esse doodgeschlaache werrn.

De Schorsch druff: Ich habb e onner Geschicht geheert: Irchendwo warn zwaa Schäfer uff de Weid, der oone hott geschloofe, der onner hott was gesse. Unn der, der was gesse hott, den hott de Blitz erschlaache unn der, der geschloofe hott, dem iss nix bassiert.

Ich habb e bissi iwverleecht. Doo kann was droo soi, weil der, der was gesse hott, sicher uffrecht gesetze hott. Weil merr joo sacht, wens Gewidder iwver derr iss, im Feld odder so, sollsde dich platt uff de Boddem leeche, dann deder nix bassiern.

Doo lässt de Karl sichs erstemol heern: Merkder wie unser Zeit vergieht? Heit steit merr beim Gewitter nachts nimmi uff unn bet aach nit, daachsiwver isst merr alsfort wieder unn zieht heechstens de Stecker vom Fernseher aus de Dos.

Eiern Honnes